

# Il Festival da teater a Tusaun 2013 è lantschà

■ **Cun sia emprima sesida l'entschatta da settember ha il comité d'organisa-ziun dal Festival grischun da teater a Tusaun lantschà uffizialmain l'ediziun 2013. Da nov cumenza la fin d'emna da festival gia la gievgia, profitar da quai duai oravant tut il teater d'affons e giuvenils.** Il Festival grischun da teater ha lieu dapi l'onn 1989 en in turnus da trais onns. Proxima primavaira organischescha l'Uniun grischuna per il teater popular BVV-UTP-AGT il festival gia per la novavla giada. El è s'establì ils davos 20 onns sco inscunter cultural e porscha mintgamai ina survista sur dal teater en las trais linguas dal chantun Grischun. La finamira dal festival da teater è da tgirar ils contacts denter las gruppas da teater e da

pussibilitar in barat cultural denter las trais regiuns linguisticas. Quai vegn er ad esser il cas tar l'ediziun 2013. Il 9. Festival da teater Tusaun ha lieu dals 18 fin ils 21 d'avrigl 2013 – il patronadi giascha era questa giada en ils mauns dal cusseglier dals chantuns *Stefan Engler*.

## Da nov: Entschatta gia la gievgia

A Tusaun vegnan puspè en funcziun las localitads da giugar cumprovadas: il kino Rätia, la halla e l'aula da la scola. I dat dentant era novaziuns: La fin d'emna da festival cumenza gia la gievgia. Quai oravant tut per dar avunda plaz al teater d'affons e giuvenils. La gievgia daventa uschia il di da teater da la giuventetgna. Cun dar avunda atenziun al teater da

giuventetgna tschentant ins er in segn per promover la generaziun da teater giuvna.

## S'annunziar ussa

Per che Tusaun damenti proxima primavaira il lieu da scuntrada dal teater grischun spera il comité d'organisa-ziun sut la bitgetta da *Lina Frei-Baselgia* da survegnir bleras annunzias da l'entir chantun. Uniuns e gruppas ch'èn interessadas pon s'annunziar enfin ils 20 d'october. I vegn preferì tocs curts da 10 fin 80 minutas.

**Annunzias ed ulteriuras infurmaziuns datti tar il secretariat dal festival: Riccarda Sulser, Gemsweg 4, 7000 Cuira, telefon 081 353 42 45, fax 081 353 99 28, mail: festival@bv.ch.**